



SIARAN MEDIA / MEDIA RELEASE

MENTERI KEWANGAN MALAYSIA/MINISTER OF FINANCE

31 MEI 2018

TABUNG HARAPAN MALAYSIA

1. Kementerian Kewangan amat menghargai usaha rakyat Malaysia yang bermurah hati menyalurkan dana tanpa henti ke Tabung Harapan Malaysia yang baharu sehari diwujudkan untuk membantu Kerajaan Persekutuan membayar balik jumlah hutang negara yang amat membebankan.
2. Sesungguhnya, rakyat Malaysia telah meningkatkan semangat patriotik mereka ke tahap yang lebih tinggi di mana mereka bersedia untuk berkongsi sedikit daripada gaji dan wang mereka untuk membantu membina semula negara yang kita cintai ini.
3. Rakyat Malaysia, terutamanya golongan muda seperti aktivis undang-undang yang berpengalaman Cik Shazarina Bakti, terus memainkan peranan mereka dalam pembangunan negara tanpa penat lelah selepas kemenangan Pakatan Harapan pada pilihanraya yang lalu.
4. Dengan inisiatif Cik Shazarina sendiri, beliau telah mengumpul dana sebanyak RM13,476.57 melalui halaman 'fundraising' seminggu sebelum tabung ini dilancarkan. Untuk itu, saya memuji usaha beliau untuk mengajak seluruh rakyat Malaysia daripada semua lapisan masyarakat untuk menyumbang kepada negara.

5. Sememangnya inilah semangat perpaduan dan harapan yang bakal mendorong kerajaan Pakatan Harapan untuk bergerak ke hadapan demi memenuhi segala janji-janji kita terhadap rakyat.

6. Saya juga ingin mengumumkan bahawa setakat jam 3 petang hari Khamis (31 Mei), Tabung Harapan Malaysia setakat ini telah berjaya mengumpul RM7,075,508.79 kurang daripada 24 jam tabung ini dilancarkan. Ini adalah satu kejayaan yang luar biasa.

7. Memandangkan ini melibatkan dana yang disumbangkan oleh rakyat, Kerajaan komited untuk terus telus dengan setiap sen yang diterima. Oleh itu, jumlah yang dikutip akan dikemaskini setiap hari di laman web Kementerian Kewangan dan pada platform media sosialnya.

8. Bagi tujuan pemotongan cukai, rakyat Malaysia yang menderma dana ini dinasihatkan supaya menyimpan rekod transaksi sebagai bukti bagi memudahkan gerak kerja Lembaga Hasil Dalam Negeri seperti yang dinyatakan di bawah Subseksyen 44 (6) Akta Cukai Pendapatan 1967.

Sayangi Malaysiaku!

YB Lim Guan Eng
Menteri Kewangan
Putrajaya
31 Mei 2018